

CARITAS AUSTRALIA

Vizaun Jerál kona-ba Organizasaun no Aproximasaun kona-ba Jéneru

Caritas Australia (Ajénsia Katólíka kona-ba Ajuda ba Tasi-Balun no Dezenvolvimentu), ne'e ONG internasionál ida husi Australia ne'ebé harii iha fee katólíku. Nia sentru eskritóriu iha Timor-Leste bazeia iha Dili, maibé organizasaun ne'e halo servisu iha distritu sira seluk, inklui Oecusse, Baucau no Lautém. Caritas Australia Timor-Leste hahu ho membru Timoroan, nune'e mós nia diretor.

Caritas Australia nia vizaun maka atu fó kontribuisaun hodi dezenvolve comunidade lokál ida ne'ebé sustentável, la'ós de'it atu hetan auto-sufisiénsia no sai ativu maibé fó valor ba justisa, sadi'a no dignidade umana. Atu hetan vizaun ida-ne'e, Caritas Australia fó importánsia atu servisu hamutuk ho parseiru ONG sira ne'ebé hala'o servisu iha Timor-Leste. Maske parseiru ida-ne'e gasta tempu barak no rekursus maka'as, organizasaun ne'e haree katak servisu hamutuk ho parseiru ONG sira bele garante patrimóniu komunitáriu no comunidade nia envolvimentu barak liu iha programa nia atividade sira. Hakbiit tiha kapasidade, bele harii fiar-malu, no comunidade senti katak nia iha ona kbiit atu molda programa nia diresaun iha loron-abanbainrua. Organizasaun ne'e determina mós katak iha nesesidade atu iha kometimentu tempu naruk ba comunidade ne'ebé nia servisu ba, nia programa no nia parseiru sira, hodi bele hetan susesu bainhira alkansa programa nia objetivu sira.

Caritas Australia hala'o nia atividade prinsipál iha área jéneru ninian mak programa Direitos Umanus, Lei no Justisa. Husi perspetiva direitos umanus nian, programa ne'e fó atensaun liu-liu ba violénsia seksuál no violénsia doméstika. Programa atividade sira varia husi atividade kona-ba hasa'e koñesimentu hodi fó apoiu ba ema sobrevivente sira no implementasaun ba estratéjia prevensaun violénsia. Organizasaun ne'e konsidera mane nia papél hanesan spesífiku no importante tebes iha prevensaun hasoru violénsia ne'ebé bazeia ba jéneru (GBV), tan ne'e nia halo servisu atu asegura mane nia envolvimentu ativu iha nível pesoál ninian no nível comunidade ninian.

Programa

Caritas Australia iha área programa importante rua iha Timor-Leste: sustentábilidade dezenvolvimentu ba comunidade iha area rurais no programa kona-ba Direitos Umanus, Lei no Justisa (HRLJ). Énfaze ne'ebé fó ba jéneru, HRLJ nia sumáriu hanesan tuir mai.

Programa HRLJ harii iha Abril 2001. Hahú husi 2001 to'o 2004, programa ne'e nia atensaun boot maka atu implementa atividade edukasaun ninian, ne'ebé prepara atu envolve comunidade atu aprende no hanoin kritikamente kona-ba asaltu seksuál. Caritas Australia mak dezenvolve uluk ekipa treinamentu Timor-Leste nian, involve fetu nain ne'en ne'ebé ekipa ne'e bele servisu iha área ne'ebé responde ba asaltu seksuál. Iha 2002 rekruta tan mane na'in neen iha ekipa ne'e, ne'ebé molok ida ne'e fetu sira de'it maka hetan treinu atu servisu iha área treinu iha Timor-Leste kona-ba oinsá atu hatán ba asaltu seksuál. HRLJ nia ekipa halo servisu iha distritu sanulu resin tolu, tau prioridade liu-liu atu fó treinu ba líder lokál sira.

Bainhira hala'o treinu, ekipa ne'e halo servisu ho órgaun komunikasaun sira no halo mós publikasaun atu oinsá ba to'o organizasaun no comunidade sira. Órgaun komunikasaun sira-ne'e inklui rádiu no televizaun no livru ki'ik-oan ida kona-ba saida maka comunidade sira bele halo bainhira mosu kazu ruma kona-ba asaltu seksuál (naran 'Hatudu Dalan').

Iha 2004, halo fali estrukturasan no fó fali orientasaun ba programa ne'e, ne'ebé ekipa ne'e decide muda atensaun boot ne'ebé nia fó atu hato'o assisténsia ba sobrevivente asaltu seksuál ninian ba fali área prevensaun ninian (GBV). Programa ne'e decide mós atu fó atensaun ba área jeográfika espesífika sira. Oras-ne'e, programa HRLJ iha unidade haat: *Strong Partnership and Empowered Communities* (SPEC), *Social Awareness and Prevention* (SAP), *Enabling Access to Social Justice* (EAS Justice), no *Access to Justice through Traditional Justice* (AJTJ).

Ekipa SPEC servisu liu-liu ho parseiru lokál sira atu dezenvolve organizasaun hirak ne'e ninia abilidade atu servisu iha área GBV iha sira-nia comunidade laran. Nia fó apoiu ba organizasaun sira ho programa kona-ba desenvolvimentu no implementasaun no identifika fonte finansiamentu nian.

Ekipa SAP halo servisu hodi dezenvolve treinu no rekursus. Nia prodús material, hanesan kartás no panfletu, ho objetivu atu halo sosializasaun ba comunidade atu komprende no hatán ba GBV. SAP halo mós servisu atu fó treinu ba treinadór foun sira iha sira-nia organizasaun parseiru sira, bazeia ba SAP ninia manúal kona-ba treinu, no atu hala'o monitorizasaun no avaliasaun ba parseiru sira-ne'e.

Unidade Justisa EAS halo servisu kona-ba projetu boot rua: Hametin Servisu ba Sobrevivente sira no Apoiu ba Prizaun. Liuhusi Hametin Servisu ba Sobrevivente sira, Caritas servisu ho organizasaun parseiru sira atu harii no hala'o '*saferooms*' ba vítima sira husi GBV: Forum Peduli Wanita iha Oecusse, PRADET Timor-Leste iha Dili, no Centro Buka Hatene iha Baucau. Programa Apoiu ba Prizaun hala'o iha kadeia Gleno no Baucau. Nia fó treinu vokasionál ba dadur mane sira, no la kleur programa ne'e sei haluan tan hodi inklui treinu iha área GBV ninian atu fó apoiu ba ema ne'ebé uluk halo violénsia hodi hakotu tiha siklu violénsia nian.

Unidade AJTJ ne'e Caritas Australia nia programa HRLJ ninia desenvolvimentu foun liu ida. Unidade ne'e oras-ne'e sei iha faze pilotu nia laran, no nia servisu atu halo dokumentasaun kona-ba mekanizmu justisa tradisionál ne'ebé suco rua uza (Nipane iha distritu Oecusse no Mehara iha distritu Lautém) bainhira lida ho kazu sira kona-ba GBV. Iha faze ida tuir mai, ekipa ne'e hanoin atu envolve líder tradisionál sira iha área justisa nian atu nune'e bele promove utilizasaun konseitu jéneru no GBV ninian bainhira sira halo desizaun kona-ba kazu hirak ne'e.

Programa HRLJ nia parseiru lokal sira inklui Centro Feto Enclave, BIFANO no Forum Penduli Wanita iha Oecusse, ONE no Asosiasaun Mane Kontra Violensia (AMKV) iha Lautém, PRADET Timor-Leste iha Dili, no Centro Buka Hatene iha Baucau.

HRLJ nia ekipa buka atu envolve ativamente iha kampaña no iha rede nasional relevante sira. Nia iha mós kapasidade ki'ik ida subsídiu ninian atu fó ba organizasaun lokál sira atu dezenvolve atividade iha área GBV.

Kontaktu

Post: PO Box 186, Dili, Timor Leste

Contact Information for Gender Focal Point Fernando Pires:

Tel: (670) 724 7103

Email: fernandop@caritas.minihub.org

Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 23-25.